

No. 858.

AKTA UNIVERSITI DAN KOLEJ UNIVERSITI 1971

PERLEMBAGAAN UNIVERSITI MALAYA

STATUT UNIVERSITI MALAYA
(SENAT) 2024

Pada menjalankan kuasa yang diberi di bawah subseksyen 35(1) Perlembagaan Universiti Malaya, Canselor membuat Statut yang berikut:

Nama

1. Statut ini bolehlah dinamakan Statut Universiti Malaya (Senat) 2024, dan hendaklah berkuat kuasa pada tarikh ia disiarkan dalam *Warta*.

Keahlian

2. (1) Senat hendaklah terdiri daripada—

- (a) Naib Canselor, yang hendaklah menjadi Pengerusi;
- (b) semua Timbalan Naib Canselor;
- (c) semua Dekan, Pengarah atau Pengarah Eksekutif Fakulti, Sekolah, Pusat, Akademi dan Institut dan semua Ketua Kampus Cawangan, atau apa-apa nama lain yang ditetapkan oleh Jawatankuasa Pengurusan Universiti;
- (d) tidak lebih daripada dua puluh (20) orang profesor sepenuh masa yang dipilih bagi tempoh tiga (3) tahun oleh semua profesor dan profesor madya sepenuh masa Universiti; dan
- (e) tidak lebih daripada lima (5) orang daripada Universiti yang hendaklah diko-opt oleh Naib Canselor selama tiga (3) tahun.

- (2) Tertakluk kepada subperenggan 2(1)(d), tatacara pemilihan dan jumlah keahlian hendaklah ditentukan oleh Senat.

- (3) Pendaftar atau wakilnya hendaklah menjadi Setiausaha Senat.

- (4) Pendaftar, Bursar, Ketua Pustakawan dan Penasihat Undang-Undang hendaklah menjadi ahli *ex-officio* tetapi tidak berhak untuk mengundi dalam mesyuarat Senat.

Tempoh keahlian ahli dipilih dan ahli diko-opt

3. (1) Tempoh keahlian seseorang ahli dipilih dan ahli diko-opt hendaklah selama tiga (3) tahun.

(2) Ahli yang dipilih untuk mengisi kekosongan keahlian ahli dipilih, yang terhenti menjadi ahli menurut perenggan 2 Jadual Perlembagaan, hendaklah memegang jawatan selama baki tempoh ahli yang terdahulu itu dipilih.

(3) Ahli yang diko-opt untuk mengisi kekosongan keahlian ahli diko-opt, yang terhenti menjadi ahli menurut perenggan 2 Jadual Perlembagaan, hendaklah memegang jawatan selama baki tempoh ahli yang terdahulu itu diko-opt.

Perletakan jawatan dan pembatalan pelantikan

4. (1) Ahli dipilih atau ahli diko-opt boleh meletakkan jawatan dengan memberikan suatu notis satu (1) bulan secara bertulis kepada Pengerusi.

(2) Seseorang ahli Senat hendaklah terhenti daripada menjadi ahli sekiranya—

- (a) dia tidak menghadiri mesyuarat Senat tiga (3) kali berturut-turut tanpa kebenaran Pengerusi Senat;
- (b) pelantikannya sebagai Dekan, Pengarah atau Pengarah Eksekutif Fakulti, Sekolah, Pusat, Akademi atau Institut atau Ketua Cawangan dibatalkan;
- (c) dia meletakkan jawatan tersebut; atau
- (d) dia hilang kelayakan di bawah perenggan 1, Jadual Perlembagaan.

Fungsi dan Kuasa Senat

5. Senat hendaklah mempunyai fungsi dan kuasa seperti yang diperuntukkan di bawah subseksyen 4(3) dan subseksyen 22(6) Perlembagaan, dan termasuklah fungsi dan kuasa untuk—

- (a) menimbangkan cadangan mengadakan statut baharu atau meminda statut atau membatalkan statut, menurut subseksyen 35(3) Perlembagaan;
- (b) memberikan arahan-arahan mengenai pengajaran dan penyelidikan;
- (c) memberikan arahan am mengenai kemudahan pengajaran dan penyelidikan lain di Universiti; dan
- (d) membuat perakuan kepada Lembaga mengenai semua perkara lain yang tidak ditugaskan secara khusus kepada mana-mana Pihak Berkuasa Universiti, selain daripada Senat dan Lembaga.

Mesyuarat

6. (1) Senat hendaklah mengadakan mesyuarat pada tarikh, masa dan tempat seperti yang ditetapkan oleh Pengerusi dan mesyuarat hendaklah dipanggil oleh Setiausaha Senat.

(2) Dalam masa ketidakhadiran Pengerusi, seorang Timbalan Naib Canselor hendaklah mempengerusikan mesyuarat Senat.

(3) Kuorum Senat adalah satu pertiga (1/3) daripada jumlah ahlinya, tidak termasuk ahli *ex-officio* dan mana-mana orang yang dinyatakan di bawah subperenggan (4).

(4) Senat boleh mengundang mana-mana orang, termasuk mana-mana pelajar, untuk menghadiri mesyuarat bagi memberi pandangan atau menasihati Senat tentang apa-apa perkara yang sedang dibincangkan tetapi orang atau pelajar itu tidak berhak mengundi.

Kuasa mewakilkan

7. (1) Senat boleh mewakilkan mana-mana kewajipan, fungsi atau tanggungjawabnya kepada ahli-ahlinya atau suatu jawatankuasa yang terdiri daripada ahli-ahlinya.

(2) Walau apa pun subperenggan (1), Senat boleh, sekiranya ia berpendapat perlu, menyemak mana-mana keputusan yang dibuat oleh pihak yang kepadanya ia telah mewakilkan kuasa dan boleh mengesahkan, membatalkan, mengubah atau meminta pihak itu menimbangkan semula keputusan itu.

Pembatalan

8. Statut Universiti Malaya (Senat) 1997 adalah dibatalkan.

Dibuat 9 Disember 2024

SULTAN NAZRIN MUIZZUDDIN SHAH IBNI
ALMARHUM SULTAN AZLAN MUHIBBUDDIN SHAH AL-MAGHFUR-LAH
Canselor
Universiti Malaya